

Minister Otmar Oduber (POR):

‘Plannan ta continua pa haci di San Nicolas un ciudad di herencia y Cultura’

ORANJESTAD – Ex-Greenhill ta un di e edificionan di gobierno cu a keda para/bandona pa hopi aña. Un di e motibonan pa cual gobierno a tuma e decision pa renoba e edificio aki ta, entre otro, pa motibo cu ta pushando pa continua cu e plan di haci di San Nicolas un ciudad di Cultura y Herencia.

Sr. Oduber ta splica cu a tuma e decision di e renobacion di e edificio conhuntamente cu colega minister FEC, Xiomora Ruiz-Maduro (MEP). Ta trata di un inversion relativamente grandi mirando e situacion den cual e edificio tabata haya su mes, y e meta cu tin ta pa e por bira un atraccion pa nos turismo tambe, segun un comunicado di gobierno. Colega minister di deporte, Dangui Oduber (MEP), tambe a anuncia diferente plan pa San Nicolas manera pa Baby Beach, Rodgers Beach y mas plan cu tin



pa henter e area. E edificio di ex- Greenhill ta un di e sitionan caminda cu lo ubica e Carnival Exhibition, como tambe e tercer museo

pa San Nicolas, cu den e caso aki, ta e museo di antiguedad cu lo bin den e edificio net na banda di Greenhill.

Mas proyectonan andando

Recientemente a firma pa e ‘aanbesteding’ di Uncle Louis Store tuma luga den luna

di november, cual ta refleha e cantidad di trabou cu ta andando pareu pa parti pariba di nos isla. Den e fin di siman a mira trabounan tumando luga pa drecha e rotonde di San Nicolas, casnan den mal estado ta wordo haci limpi door di City Inspectors, Serlimar, DOW y henter e team di Infra. “Hopi trabou ta andando na San Nicolas y kier mira esakinan cla mas pronto cu ta posibel.”

Segun e comunicado, San Nicolas tin tur atencion di gabinete Wever-Croes, y e plan ta pa haci di San Nicolas un atraccion turistico y centro di herencia y cultura.

“Como minister cu semper a para tras di e idea aki, ta sumamente contento cu e gabinete Wever-Croes y colega sra. Ruiz-Maduro, sr. Dangui Oduber y minister Chris Romero, ta hunto riba un liña, canando pa logra e meta cu a pone nos dilanti!”, e comunicado ta finalisa.